



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Distritu Viqueque
11 Setembru 2015

Povu Loi-Ulu konsidera deputadu la representativu no husu ba Parlamentu Nasionál (PN) tenki halo alterasaun ba Lei Eleitorál

Iha 09 Setembru 2015, JSMP kontinua hala'o treinamentu kona-ba "Demokrasia no Kna'ar PN iha prosesu halo lei" iha Suku Loi-Ulu, Postu Administrativu Watukarbau Munisípiu Viqueque. Treinamentu ne'e, hetan partisipasaun másimu husi comunidade no estrutura suku ho total participante hamutuk ema na'in 31, kompostu husi mane 16 no feto 15.

Durante treinamentu partisipante sira hato'o sira nia lamentasaun kona-ba servisu deputadu sira nian ne'ebé la representa ona povu hodi halo lei, fiskaliza no halo desizaun polítika bainhira eleisaun remata. Tambá ne'e comunidade sira ezíje ba Governu no PN atu halo alterasaun ba Lei Eleitorál (Lei Nú. 7/2011) ba Parlamentu Nasionál nian, liu-liu atu hatuur kritériu rigirozu ne'ebé bele asegura kualidade kandidatu sira ne'ebé atu tuur iha Parlamentu Nasionál.

"JSMP konsidera ejijénsia comunidade atu altera lei eleitorál ne'e relevante no prezisa tau iha konsiderasaun, tanba kualidade no produtividade PN depende ba kualifikasaun membru deputadu sira, dehan Diretór Ezekutivu JSMP, Luis de Oliveira Sampaio.

Iha treinamentu ne'e JSMP mós husu ba comunidade sira tenki kaer mentin prinsípiu demokrátiku hodi respeitu ema seluk nia hanoin no opsaun atu hili, toleransia, pluralismu, igualidade no direitu atu hetan asesu ba justisa no seluk-seluk tan.

Iha abertura ba treinamentu ne'e, Xefi Suku Loi-Ulu Sr. Matias da Silva de Jesus agradese ba JSMP no husu ba partisipante sira atu tau importánsia hodi rona materia ne'e. Atu nune'e depoisde treinamentu bele kontinua hatutan informasaun importante hirak ne'e ba comunidade sira ne'ebé la partisipa iha treinamentu ne'e.

Treinamentu ne'e realiza tanba hetan Apoiu Finanseriu husi VI Governu Konstitusionál liuhusi Gabinetei Primeiru Ministru ba Asuntu Sosiedade Sivil.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org